



«Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԸ
ԵՒ ՈՌԻՄԻՆԻԱՆ» ԳՐՔԻ ՇՆՈՐՀԱՆԴԵՍԸ

Նոյեմբերի 8-ին, Ռուսինիայի հայոց թեմի Բուխարեստի Առաջնորդանիստ Սրբոց Հրեշտակապետաց եկեղեցու 110-ամյակի եւ վերածման առիթով կազմակերպված միջոցառումների շրջանակներում, «Վիկտոր եւ Հովսեփ Դուդյան» մշակույթի տանը առանձնահատուկ շուքով եւ ոգեւորությամբ տեղի ունեցավ Ամենայն Հայոց Հայրապետին նվիրված «Ն.Ս.Օ.Տ.Տ. Գարեգին Բ. Ամենայն Հայոց կաթողիկոսը եւ Ռումինիան» («Զամկա» հրատ., Բուխարեստ, 2025 թ., 287 էջ, ուումիներեն) խորագրով գրքի շնորհանդեսը:

Գիրքը հրատարակվել է Նորին Սրբության Գահակալության 26-րդ տարեդարձի առիթով՝ նախաձեռնությամբ եւ օրհնությամբ թեմակալ առաջնորդ գերշ. Տ. Տաթեւ եպս. Հակոբյանի: Գրքի գլխավոր խմբագիրը ուումինահայ նշանավոր լրագրող եւ թարգմանչուհի՝ տիկին Մադլեն Կարագաշյանն է, խմբագիրներն են գերշ. Տ. Տաթեւ եպս. Հակոբյանը, արժ. Տ. Օշական քհն. Խաչատրյանը եւ առաջնորդարանի քարտուղարուհի Ինեսա Թումասյանցը: Հրատարակվել է թեմի «Զամկա» հրատարակչությունում՝ Ռուսինիայի հայոց միության «Արարատ» տպարանում: Հայերենից ուումիներեն թարգմանությունները կատարել են արժ. Տ. Ավետիս քհն. Մանդալյանը եւ արժ. Տ. Օշական քհն. Խաչատրյանը:

Գիրքը բաղկացած է 15 գլուխներից, որոնք ամփոփ կերպով ներկայացնում են ոչ միայն Նորին Սրբության առնչությունը Ռուսինիայի հայոց թեմի եւ ուումինահայության ազգային կյանքին, այլեւ ընթերցողի առջեւ պարզորեն ներկայացնում են «Մեծ իրագործումների Հայրապետի» արդեն իսկ քառորդ դարը բոլորած հայրենանվեր ծառայության գեղեցիկ համայնապատկերը: Գրքում ընդգրկված են Վեհափառ Հայրապետի Ռուսինիա կատարած 3 Հովվապետական այցելությունները՝ 2000, 2008 եւ 2012 թվականներին: Ռուսիներեն թարգմանությամբ ներկայացված են

Գարեգին Բ. կաթողիկոսի այն քարոզները, ուղերձները, մտքերը, որոնք ուղղակիորեն կապված են Ռումանիո հայոց թեմի եւ համայնքի հետ: Հատուկ անդրադարձ է կատարվում ազգային-եկեղեցական նշանավոր իրադարձություններին, աշխարհասփյուռ հայ երիտասարդների հետ տարվող աշխատանքներին, ինչպես նաեւ Հայոց ցեղասպանության 100-րդ տարելիցի, ցեղասպանության զոհերի սրբադասման, Արցախի հիմնահարցին եւ այլ կարեւոր իրադարձություններին, որոնք մշատպես եղել են եւ են Հայոց Հայրապետի մշտական հոգածության կենտրոնում:

Ռումանիո հայոց թեմը մշտապես եղել է Հայոց Հայրապետի հատուկ հոգածության եւ խնամքի ներքո: Իրա հերթական վկայությունը եղավ 2022 թ. թեմի կազմավորման 620-ամյա հոբելյանը հանդիսավոր կերպով Մայր Աթոռ Սուրբ Էջմիածնում տոնախմբելու հանգամանքը, որը իրապես պատշաճ վերարժեւորումն էր Ռումանիոյ Հայոց պատմական թեմի դարավոր անցյալի: Այս կարեւոր իրադարձության հետ մեկտեղ գրքում նաեւ անդրադարձ է կատարվում Գարեգին Բ. կաթողիկոսի այն կոնդակներին, որոնք ուղղակիորեն կապված են Ռումանիոյ Հայոց թեմի եւ համայնքի հետ:

Նախաբանում գետեղված իր օրհնության խոսքի մեջ թեմակալ առաջնորդը գեղեցիկ կերպով անդրադառնում է Մայր Աթոռ Սուրբ Էջմիածնից ճառագող այն լույսին, որ, ի թիվս բազմաթիվ այլ թեմերի, առանձնահատուկ ջերմությամբ է լուսավորում նաեւ Ռումանիոյ Հայոց թեմը. «Ռումինահայությունը ժամանակին նախ պատիվն ունեցավ Ամենայն Հայոց կաթողիկոսության գահի համար Մայր Հայրենիք եւ Ս. Էջմիածին ուղարկել Վազգեն եպիսկոպոս Պալնյանին, ապա, «Հրաշափառի» հնչյունների ներքո Բուխարեստի առաջնորդանիստ Սուրբ Հրեշտակապետաց եկեղեցի առաջնորդելու Ամենայն Հայոց կաթողիկոս Վազգեն Առաջինին: Իր կարճատեւ հայրապետության ընթացքում Ռումինիա հայրապետական այցելությամբ հասցրեց լինել նաեւ երջանկահիշատակ Գարեգին Առաջինը: Երիցս՝ 2000, 2008 եւ 2012 թթ. Ռումինիա հայրապետական եւ հովվապետական այցելություն է ունեցել նաեւ Ն. Ս. Օ. Տ. Տ. Գարեգին Բ. Ամենայն Հայոց կաթողիկոսը, որպես Ս. Էջմիածնի լույսի կրողը եւ փոխանցողը: Երեւ անգամ էլ Նորին Սրբությունը բարձրորեն ընդունվել ու եղբայրական ջերմ սիրով է պատվվել իրարահաջորդ ուումին երկու պատրիարհների՝ նախ երջանկահիշատակ Թեոկտիստ Առաջինի եւ ապա ներկայիս Դանիել պատրիարհի կողմից, 2008 թ.: Հայրապետական

այս այցելությունները ազգային-հոգևոր վերարթնության մի նոր լիցք են դարձել Ռումինահայության համար...»:

Այս հրատարակության առանձնահատուկ կողմերից մեկն էլ այն է, որ հատուկ շեշտադրում է կատարում Գարեգին Բ. Ամենայն Հայոց Հայրապետի ունեցած միջազգային բարձր հեղինակությանը՝ թե՛ Արեւելյան քույր եկեղեցիների, թե՛ Արեւմտյան կաթողիկե եւ թե՛ Ուղղափառ աշխարհում: Վերջինս առանձնակիորեն է կարեւորվում ուսմինահայության համար, քանի որ Ռումին Ուղղափառ եկեղեցին մեծ դիրք եւ հեղինակություն ունի Ռումինիայում, ուստի թե՛ Ռումին Պատրիարքների այցելությունները Սուրբ էջմիածին եւ թե՛ Հայոց Հայրապետների այցելությունները Ռումինիա եւ եղբայրական ողջագուրումներն իրենց ուղղակի դրական արձագանքն են ունենում հայ համայնքի կյանքից ներս: Հատկանշական է նաեւ այն իրողությունը, որ Գարեգին Բ. Կաթողիկոսը 2000 թ. Ռումինիայի Հանրապետության նախագահ էմիլ Կոնստանտինեսկուի կողմից արժանացել է Ռումինիայի ազգային բարձրագույն «Ռումինիայի աստղ» շքանշանի, իսկ 2012-ին՝ Ռումինիայի Ուղղափառ եկեղեցու ներկայիս Հովվապետ Նորին Սրբություն Դանիել Պատրիարքի կողմից արժանացել է Ռումեն եկեղեցվո բարձրագույն՝ «Սուրբ Անդրեաս Առաքյալ» պատվո շքանշանի: Եւս մի արժանահիշատակ իրադարձություն. 2023 թ. Արցախի բռնի տեղահանումից հետո, արցախցիների կարիքները թեթեւացնելուն ուղղված Ամենայն Հայոց Հայրապետի ջանքերին շոշափելի աջակցություն բերեց Ռումին Ուղղափառ եկեղեցին, որի շնորհիվ հնարավոր եղավ տեղահանված 8 ընտանիքների ապահովել բնակարաններով: Սա իրապես աննախադեպ երեւույթ է միջեկեղեցական հարաբերություններում եւ քրիստոնեական սիրո լավագույն վկայություն:

Օտարալեզու այս հրատարակությունը ընդամենը մի փոքրիկ ընծա է՝ ի գնահատանս ազգընտիր Հայրապետի անձնվեր ծառայության, որի 26 տարիների միջից ասես արձագանքում են Սահակ Գ. Զորափորեցի Հայրապետի «էջ Միածինն ի Հօրէ» շարականի հետեւյալ խոսքերը. «Եկայք շինեսցուք զՍուրբ Խորանն լուսոյ»: 1999-ից մինչեւ այսօր, Նորին Սրբության գահակալության տարիները իրապես եղան Հայ եկեղեցու շինության, հոգևոր վերածննդի ու զարթոնքի տարիներ, բարգավաճման ու բարեփոխումների տարիներ:

Առ Աստված աղոթքով միանում ենք «Հայրապետական մաղթերգի» գեղեցիկ բառերին՝ վերստին ասելով.

Ամեն հայի սրտից բխած,
Լսիր այս ձայն, ով Աստված.
Երկար կյանք տուր Հայրապետին,
Երկար օրեր Հայոց Հոր.
Տե՛ր, անսասան պահիր դու միշտ
Քո իսկ հիմնած Մայր Աթոռ:

ՌՈՒՄԱՆԻՈՅ ՀԱՅՈՑ ԹԵՄԻ
ՄԱՄԼՈ ԴԻՎԱՆ

